

經

義

述

聞

經義述聞第十九

高郵王引之

春秋左傳下七十條

不靖其能 造舟于河 露其體 是謂近女室疾如
蠱 董振擇之 寡君舉羣臣 且諺曰 四方之虞
亨神人 以盟其大夫 使亂大從 議事以制
聳之以行 願與諸侯落之 寵靈 行期 黃熊
陟恪 不能相禮 聖人之後 官職不則 樂 孤
斯易在衰經之中 貌不道容 是四國者 形民之
力 子毋勤 曰義也夫 非無賄之難 大城城父
札瘥天昏 私族於謀 棠君尙 親戚 鄙 琴

張字子開名牢 齊侯疥遂瘡 偃介之關 取人於
窪蒲之澤 古之遺愛 廷求枉反 問于介眾 莫
用成周之寶珪于河 五牲三犧 季邱 宣王有
志 以閒先王 官宿其業 易之亾也 若爲三師
以肄易 有所有名而不如其已 不爲義疚 魯君
世從其失 元年春正月辛巳晉魏舒合諸侯之大夫
于狄泉 孟懿子會成周 簡物典策 少帛 燕
閒王室 以約爲刊 如駟之斬 彤鏤 三軍之事
乎不與謀師乎帥乎何黨之乎 潛師閉塗 先王
一盛 叔孫氏之車子鉏商 爭明 使處吳竟 魯

人之泉

不靖其能 請免之以靖能者

昭元年傳魯雖有罪其執事不辟難畏威而敬命矣子若免之以勸左右可也若子之羣夷處不辟污出不逃難其何患之有患之所生污而不治難而不守所由來也能是二者又何患焉不靖其能其誰從之魯叔孫豹可謂能矣請免之以靖能者子會而赦有罪又賞其賢諸侯其誰不欣焉望楚而歸之視遠如邇杜注不靖其能二句曰安靖賢能則眾附從引之謹案其能請處不辟污出不逃難也而云安靖其處不辟污出不逃難則

文不成義矣。今案傳曰靖其能。又曰賞其賢。則靖與賞意當相近。傳又曰子若免之以勸左右可也。又曰請免之以靖能者。則靖有表章風勸之義。靖當讀爲旌。旌表也。言魯使本當戮。以其能是二者而免之。所以表章之也。表其能。卽是賞其賢。故下文又曰賞其賢矣。旌表其能。所以勸羣吏。若不旌其能以示之。孰肯勸勉而爲能者乎。故曰不旌其能其誰從之也。僖二十四年傳以志吾過。且旌善人。哀十六年傳猶將旌君以徇於國。竝與此同義。以六書之例求之。靖從青聲。青從生聲。主卽旌生字。旌亦從生聲。故旌字得通作靖。旌之通作靖。猶旌之通作

精也。列子說符篇。東方有人焉。曰爰旌目。後漢書張衡傳。注引作爰精目。孟郁傾堯廟碑。師工旌密。卽精密字。

造舟于河

造舟于河。正義曰。詩云。造舟爲梁。是比舟以爲橋也。釋水云。天子造舟。李巡曰。比其舟而渡曰造。孫炎曰。比舟爲梁。郭璞曰。比船爲橋。皆不解造義。蓋造爲至義。言船相至而竝比也。家大人曰。造之言曹也。相比次之名也。造次一聲之轉。故凡物之次謂之造。昭十一年左傳。僖子使助蕞氏之蕞。杜注曰。蕞副倅也。張衡西京賦。屬車之造。薛綜注曰。造副。故薛綜注東京賦曰。造舟以舟相比。義與造舟竝相近。故薛綜注東京賦曰。造舟以舟相比。次爲橋也。李巡孫炎皆言比舟。正義造字之義。冲遠

不得其解而轉訓爲玉爾雅釋文訓造爲作。宣十二年公羊傳疏引舊說訓造爲誼。又轉訓爲成皆由不知造爲比次之義故望文生訓而卒無一當矣。

露其體

於是乎節宣其氣勿使有所壅閉。湫底以露其體。杜注曰。湫。集也。底。滯也。露。贏也。豈之則血氣集滯而體羸露。家大人曰。露。猶疲也。憊也。呂氏春秋盡數篇曰。形不動則精不流。精不流則氣鬱鬱。處頭則爲腫。爲風。處耳則爲揭。爲聾。處目則爲瞶。爲盲。處鼻則爲鼽。爲窒。處腹則爲張。爲疝。處足則爲痿。爲蹇。然則氣鬱而不宣者。體之

所以憊也。故曰：勿使有所壅閉秋底以篇其體。方言曰：

露，敗也。管子五輔篇曰：振罷露。罷與露同資乏絕。秦策曰：諸

侯見齊之罷露，是露為疲憊之義。露，羸一聲之轉。故廣

雅曰：疲，羸也。與憊同極也。列子湯問篇：氣甚猛，形甚露。張

湛曰：有膽氣而體羸虛，是露即羸也。孟子滕文公篇：是

率天下而路也。趙注曰：是率導天下之人以羸路也。今

羸路作羸困之路。此後人不曉路字之義而妄改之也。本

案音義曰：丁張並云路與露同。又所列注文內無困之

二字。今呂氏春秋不屈篇：士民罷路。秦策：士民路病於

內。高注並曰：路，羸也。路，路皆與露同。故杜言體羸露也。

正義不曉露字之義，乃云：肌膚疲，則骸骨露。又云：羸露

是露骨之名。其義與裸相近。裸露形也。露露骨也。皆失之。

是謂近女室疾如蠱

是謂近女室疾如蠱。正義曰。女在房室。故以室言之。家大人曰。晉侯以近女而生疾。不言近女而言近女室。於義轉迂。易林鼎之復云。女室作毒。為我心疾。則漢人所見本已與今同。案室當為生。字之誤也。蓋生誤為至。是又誤為室。

謂近女為句。生疾如蠱為句。本文女蠱為韻。下文食志祐為韻。傳凡言是謂者。文多用韻。若是謂鳳皇于飛。和鳴鏘鏘。有嬌之後。將育于姜。是謂沈陽。可以興兵之類。若以近女室為句。疾如蠱為句。則失其韻矣。又是也。

案下文曰女不可近乎言近女室不言近女室此近女下
本無室字之證上文曰美先盡矣則相生疾又曰四姬
有省猶可無則必生疾矣下文曰淫生六疾又曰今君
至於淫以生疾此生疾二字之證又曰淫則生內熱惑
蠱之疾此生疾如蠱之證又案晉語亦曰是謂遠男而
近女惑以生蠱下文亦云非鬼非食惑以此尤是謂近
女生疾如蠱之明證也段氏說文蠱字注讀是謂近女
室疾爲句近女室非疾名不得如蠱爲句尤非

董振擇之

三年傳君若不棄敝邑而辱使董振擇之以備嬪嬙寡

人之望也。杜注曰：董，正也。振，整也。正義曰：董，正釋詁文也。振爲整理之義。言正整選擇，示精審也。引之謹案：擇女爲昏，無所用其糾正，亦無所用其整理。杜注非也。今案：董當讀爲動。動，振之言。振動也。振動謂之動振。猶恪恭謂之恭恪。昭十六年傳：無有不共恪是也。周語曰：民用莫不震動。恪恭于農，震與振通。振動者，戰栗變動也。春官大祝辨九摠，四曰振動。鄭大夫曰：動，讀爲董。書亦或爲董。後鄭曰：振動，戰栗變動之拜。是董與動通。董振擇之者，震動恪恭以擇之言敬之至也。

寡君舉羣臣

豈唯寡君舉羣臣實受其賜其自唐叔以下實寵嘉之
正義曰舉亦皆之義言舉朝羣臣也家大人曰舉當讀
爲與舉與古字通周官師氏王舉則從故書舉爲與禮
運選賢與能卽大戴禮王言篇選賢舉能也楚辭
七諫與世皆然兮王逸注曰與舉也史記呂后
紀自決中野兮蒼天舉直徐廣曰舉一作與言不唯
寡君與羣臣受賜而已先君之靈亦寵嘉之魯語曰豈
唯寡君與二三臣實受君賜其周公大公及百辟神祇
實永饗而賴之成四年傳寡君與其二三臣昭
十九年傳寡君與其二三老是也正
義失之。

且諺曰

則使宅人反之且諺曰非宅是卜唯鄰是卜二三子先

卜鄰矣。違卜不祥。家大人曰。且諺曰。本作曰。諺曰。晏子
既使宅人反其故室矣。因謂宅人曰。諺曰。非宅是卜。唯
鄰是卜。云云。上曰字。仍是記事之詞。自諺曰以下。方是
晏子之語。若作且。諺曰。則與上文不相承矣。自唐石經
上曰字誤作且。而各本皆從之。初學記居處部。太平御
覽州郡部三。引此竝作曰。諺曰。今本晏子春秋雜篇有
傳同。且諺曰三字亦同。此後人取誤本左傳竄入者。非
晏子原文。其原文見元刻本。及明沈啟南本。與左傳事
同而文異。左傳之諺曰。非宅是卜。唯鄰是卜。彼文作
先人有言曰。毋卜其居而卜其鄰舍。餘見羣書拾補。

四方之虞

四年傳。君若苟無四方之虞。杜注曰。虞。度也。家大人曰。

虞憂也。范望注：大元元瑩曰：虞憂也。繫辭傳曰：悔吝者，憂虞之象也。襄三十年傳曰：以晉國之多虞，哀五年傳曰：二三子閒於憂虞，則有疾疢。晉語曰：衛文公有邢狄之虞。韋注：虞，備也。失之。吳語曰：越曾足以爲大虞乎。韋注：虞，度也。亦失之。又曰：今伯父有荆蠻之虞，皆其證也。

亨神人

是以先王務脩德音以亨神人。杜注曰：亨，通也。陸粲附注曰：劉向新序善謀篇，援此文亨作享。古字亨享通傳，遂辨誤曰：愚謂劉自誤，非通也。陳氏芳林考正曰：亨爲古享字，固然。但此處則作通義解爲長，引之謹案，亨當從

新序讀爲享。杜不讀爲享者。蓋以神可言享。人不可言享耳。不知古人之文多有從一而省者。人固不可言享。亦得因神而并稱之。襄二年傳。萊人使正與子賂夙沙衛以索馬牛。皆百匹。正義曰。司馬法。邱出馬一匹。牛三頭。則牛當稱頭而亦云匹者。因馬而名牛曰匹。并言之耳。經傳之文。此類多矣。易繫辭云。潤之以風雨。論語云。沽酒市脯不食。玉藻云。大夫不得造車馬。皆從一而省文也。然則以享神人。亦是從一而省文耳。襄二十七年傳。能歆神人。杜注曰。歆。享也。使神享其祭。人懷其德。彼言歆神人。此言享神人。皆是因神而并及於人也。又案

亨爲古享字。以誤解爲通。故古字得存。若杜解爲享祀之享。則後人必改爲享矣。大有九三。公用亨于天子。隨上六。王用亨于西山。升六四。王用亨于岐山。皆古享字。王弼誤解爲通。故古字得存。故傳注誤解者。亦可以考見古本云。

以盟其大夫

無或如齊慶封。弑其君。弱其孤。以盟其大夫。正義曰。崔杼弑莊公。立其弟景公。孤謂景公也。以其幼小。輕弱之。惠氏補注曰。呂氏春秋載此事曰。慎行母或如齊慶封。弑其君而弱其孤。以亡其大夫。弱其孤。謂殺崔成。崔彊。

亡其大夫謂崔杼強而歿左氏傳世既久或先秦以來
所據本異當以呂覽爲正家大人曰惠說非也弱其孤
謂弱景公孔說是也盟其大夫謂崔慶盟國人於大宮
也自弑其君以下三句皆一時之事若崔杼父子之歿
在弑莊公後三年與前事絕不相涉慶封之害崔杼非
其罪之大者楚靈王無爲數之以告諸侯也呂氏春秋
作亡其大夫者亡字古讀若苾盟字古亦讀若苾說見唐韻
正盟亡同音故偕亡爲盟耳盟明亡三字古並同音管子七法篇世主所賞者實
也所親者戚也所受者民也所重者爵祿也亡君則高
不然亡君卽明君也明之通作亡猶盟之通作亡矣高
氏昧於假偕之義故云亡其大夫謂崔杼強而歿惠氏

又以弱其孤爲殺崔成崔彊夫崔成崔彊慶封已殺之矣豈特弱之而已乎且以孤爲崔杼之子則弑其君弱其孤兩其字義不相屬矣若必改盟爲公則下文之以盟諸侯又作何解何不察之甚也。

使亂大從 鄭勝亂從

五年傳豎牛禍叔孫氏使亂大從殺適立庶杜注使亂大從曰使從於亂釋文正義並引服虔注曰使亂大和順之道哀二年鄭勝亂從杜注曰釋君助臣爲從於亂引之謹案傳言亂從不言從亂杜注非也兩從字皆當訓順書傳從字多訓爲順不煩枚舉言立適大順也今殺適立庶則亂

大順矣。明君順也。今釋君助臣則亂順矣。亂從猶言犯順。信三十三年傳文不犯順是也。家語正論篇使亂大從。王肅注亦曰從順也是。舊說皆如是。杜棄而不用。何邪。惠氏補注說使亂大從亦以服注爲是。

議事以制

六年傳。曾先王議事以制。不爲刑辟。杜注曰。臨事制刑。不豫設法也。引之謹案。杜以議事爲臨事。非也。漢書刑法志引傳文。李奇注曰。先議其犯事。議定然後乃斷其罪。案李以議爲議論之議。亦非傳意。議讀爲儀。儀度也。制斷也。謂度事之輕重以斷其罪。不豫設爲定法也。說文儀度也。周語曰。儀之于民而度之于羣生。又曰。

不度民神之義不儀生物之則繫辭傳擬之而後言議

之而後動議陸績姚信本竝作儀惠氏周易述曰儀度

也將舉事必先度之

鄭注尚書大傳曰射王極之度也射人將發矢必先于此儀之發矢

則必中于彼矣君將出政亦先于朝廷度之出則應于民心

案惠說是也儀與擬皆

度也作儀者假借字耳

正義曰必議論之而後動失之

少牢下篇其胥

體儀也鄭注曰儀者儀度餘骨可用者而用之

說見前其胥體

儀也

今文儀或爲議宣十一年左傳令尹蔣艾獵城沂

程士物議遠邇昭三十一年傳士彌牟營成周議遠邇

軍事期皆言度其遠邇也魯語曰賦里以入而量其有

無付力以夫而議其老幼言度其老幼也淮南俶真篇

曰不可隱儀揆度兵略篇曰兵之所隱議者天道也隱

議卽隱儀廣雅曰是儀度之儀古通作議也鄭語伯賈

以佐舜者也漢書地理志議作儀晏子春秋外篇博學不可以儀世墨子非儒篇儀作議字又通作

義襄三十年左傳女待人婦義事也義事亦謂度事也

說見前婦義事也下

簪之以行

誨之以忠簪之以行杜注曰簪懼也漢書刑法志簪作
雙顏師古注曰雙謂獎也家大人曰顏說是也簪之以
行謂舉善行以獎勸之故楚語教之春秋而爲之簪善
而抑惡勇以戒勸其心韋注曰簪獎也方言曰自開而

而秦晉之間相勸曰聳或曰狀狀與同中心不欲而由旁人之勸語亦曰聳又曰慙慙勸也南楚凡已不欲喜而旁人說之不欲怒而旁人怒之謂之慙慙慙與聳義亦相近

願與諸侯落之

七年傳楚子成章華之臺願與諸侯落之杜注曰宮室始成祭之爲落正義曰雜記云成廟則釁之路寢成則考之而不釁釁屋者交神明之道也鄭元云言路寢生人所居不釁者不神之也考之者設盛會以落之爾檀弓云晉獻文子成室諸大夫發焉是也然則不釁似無

祭而杜言宮室始成祭之爲落者以其言落必是以酒
澆落之雖不如廟以血塗其上當祭中霤之神以安之
家大人曰注謂宮室始成祭之爲落正義謂祭中霤之
神皆於禮無據雜記注明言不覺者不神之則不祭明
矣正義又謂落是以酒澆落之尤與傳義不合庚蔚之
解雉記
注曰落謂與賓客燕會以
酒食澆落之則庾說已誤案爾雅曰落始也與諸侯落
之者與諸侯始其事也楚語伍舉對靈王曰今君爲此
臺願得諸侯與始升焉是其明證矣宮室既成於是享
賓客以落之故雜記注曰考之者設盛食以落之又引
檀弓晉獻文子成室諸大夫發焉以爲謚哀十七年傳

曰衛侯爲虎幄於賴圃成求令名者而與之始食焉事亦相類昭七年傳又曰楚子享公于新臺卽是與諸侯落之之事也然則落之之事享也非祭也四年傳叔孫爲孟鐘饗大夫以落之義與此同服虔注以落爲釁鐘正義謂以血澆落之豈非是小雅斯千箋曰宣王於是築宮廟羣寢旣成而釁之歌斯千之詩以落之則落與釁明是二事釋文訓落爲始是也正義謂以血澆落之亦非是或以爲祭或以爲釁或言以酒或言以血皆由不知落之爲始而誤以爲澆落之義也

寵靈

今君若步玉趾辱見寡君。寵靈楚國。正義曰。言開其恩。寵賜以威靈。以及楚國。引之謹案。寵靈之靈。非威靈之謂也。廣雅曰。靈。福也。言寵楚國而賜之以福也。凡傳稱以君之靈。以大夫之靈者。靈皆謂福也。三十二年傳曰。今我欲徼福。假靈於成王。哀二十四年傳曰。寡君欲徼福於周公。願乞靈於臧氏。靈亦福也。班固典引曰。蓋用昭明寅畏。承聿懷之福。亦以寵靈文武。貽燕後昆。覆以懿鑠。寵靈二字。亦承福字言之。是靈與福同義。此傳上文曰。將使衡父。照臨楚國。鎮撫其社稷。以輯甯爾民。卽所謂寵靈也。下文曰。其先君鬼神。實嘉賴之。豈唯寡君。

又承寵靈言之。是寵靈楚國。卽寵福楚國也。若云寵威楚國。則義不可通。

行期

君若不來。使臣請問行期。杜注曰。問魯見伐之期。引之謹案。下文曰。寡君將承質幣而見于蜀。則行期當謂會盟之期。襄二十四年傳。楚子使遠啟彊如齊聘。且請期。杜彼注曰。請會期是也。會盟則兩君皆行。故問魯君行期。若伐魯之期。由楚定之。何須問魯乎。

黃熊

引之謹案。晉平公夢黃熊入於寢門。左傳

昭七年國語晉

皆載此事其字並作熊熊之熊舊本無不如是正義曰

作熊字請

諸舊本也自解者以鯀為黃熊入於羽淵輒疑獸非入

水之物而讀為鼈三足能之能正義引梁主曰鯀之所

何以能入羽淵蓋出梁元帝左傳音史記夏本紀正義

曰鯀之羽山化為黃熊熊音乃來反下三點為三足也

至唐初遂有徑改為能者釋文曰今本作能者勝也謂

舊本此說之一變也或眩於熊與鼈之二說而不能定

矣遂於作能之本而如字讀之不以為熊亦不以為鼈而

以為說文之能熊屬足伯鹿見釋文此說之又一變也今

案黃熊入夢乃鯀之神神狀似熊非真熊獸也獸非入

水之物而神則可以入水中山經曰騎山神鼈圖處之

其狀如人面羊角虎爪。恆遊于睢漳之淵。出入有光。海外東經曰。朝陽之谷。神曰天吳。是爲水伯。在重重北。兩水閒。其爲獸也。八首人面。八足八尾。皆青黃。則神之獸形者。未嘗不入於水也。太平御覽獸部二十引瑯語曰。晉平公夢見赤熊。聞其惡之。而有疾。使問子產。子產曰。咎共工之卿曰浮遊。既敗於顓頊。自沒沈淮之淵。其色赤。其言善笑。其行善顧。其狀熊。則赤熊固入淵矣。此黃熊入夢。與彼略同。何得以入淵之文而疑其非獸乎。釋文載一說曰。旣爲神。何妨是獸。正義曰。神之所化。不可以常而言之。此說是也。若以爲能鼈之能。則黃字義不

可通爾雅。鼈三足。熊不云色黃。白帖卷九十七熊下引

逸周書王會篇曰。東胡獻黃熊。

今本逸周書作黃熊。蓋後人所改。

李善

注南都賦引六韜曰。散宜生得黃熊而獻之紂。則熊固

有色黃者。

黃熊蓋卽熊也。爾雅。熊如熊黃。白文。大雅韓奕曰。赤豹黃熊。

傳言黃熊。則

其獸而非鼈明甚。正義引張升反論。

今本升誤叙。反誤皮。詳見錢氏經史

問。若鮪化爲熊與騰蠅爲鼈。傳元潛通賦。鮪亟變而成熊。

與終窮爲鼈而斷。以王劭云。古人讀熊于陵反。張升用

舊音。傳元用新音。其辨明矣。張升。後漢人。傳元。晉人。而

字皆作熊。不作鼈。蓋當時猶未有三足鼈之謬說也。今

由正義所引而更以五證明之。楚辭天問。化爲黃熊。巫

何活易王逸注曰言魃死後化爲黃熊入於羽淵豈巫
醫所能復生活也王注不以爲三足鼈則其字作熊不
作能可知其證一也說苑辨物篇載國語之文曰鄭簡
公使公孫成子來聘於晉平公有疾韓宣子贊授客館
客問君疾對曰君之疾久矣今夢黃熊入於寢門不知
人鬼邪意厲鬼也子產曰晉鯀違帝命殛之于羽由化
爲黃熊以入于羽淵字正作熊與宋明道本國語相合
明道本注曰熊似鼈宋庠本文熊作能注熊似鼈其
作能似熊非也洪興祖云問補注亦誤謂國語作能其
證二也論衡死偽篇載左傳今夢黃熊入於寢門及晉
堯殛鯀於羽山其神爲黃熊之文而解之曰夢象也吉

因且至神明示象。熊羆之古。自有所爲。又無形篇魯公牛哀寢疾七月變而成虎。蘇頌有山。化爲黃熊。願身變者。冀牛哀之爲虎。繇之爲熊乎。則夫虎熊之齊。不能過人。字正作熊。與死偶篇同。且以虎熊竝言。則其爲熊字無疑。今本熊作能。加雙行小字於下。曰能音奴來反。乃後人所爲。非其原本也。豈有死偶篇作熊。而此又作能者乎。則其字爲陳氏芳林反以能字爲是。蓋考之不審也。

熊羆之熊明矣。其證三也。正義引賈逵曰。熊獸也。如傳本作能。則賈氏當以三足鼈釋之。今賈云獸而不云鼈。則其字作熊可知。檢經典釋文序錄注。左傳者六家。莫前於賈逵解詁。而字正作熊。則熊爲左氏原文也。其證四也。中山經。青要之山。南望瑱渚。禹父之所化。郭璞注曰。鯀化於羽淵。爲黃熊。今復云在此。然則一已有變怪。

之性者亦無往而不化也。是景純所據左傳國語字正作熊。其證且也。是皆左傳國語古本作熊之明驗矣。請再以杜本求之。黃熊二字。杜氏無注。蓋以熊之爲獸人所共知故耳。若作能字。則爲異狀之鼈。不得無注。故傳之作熊不作能。觀於杜之無注而知之矣。甄文類聚獸部熊引左傳夢黃熊人於寢門。白帖卷九十七熊云。晉侯夢黃熊入寢子產曰。晉堯殛鯀于羽山。其神化爲黃熊。則唐人所據之本。固有不誤者。自陸德明誤從作能之俗本。且如字讀之。而以爲熊屬足似鹿。其後國語舊音宋庠補音皆仍其誤。夫訓爲獸名。則當作熊。訓爲鼈名。則當作能。今作能字。而以爲獸名。則既不合於舊本之熊。又不合於三足鼈。

之能。是創前人未有之曲說。所謂歧又有歧也。且能如字讀者。獸名也。如謂獸不可以入水。則雖改而爲能。仍非入水之物。如謂神之所化。自可入淵。則舊本作熊。理本無礙。何須改而爲能乎。甚矣其謬也。陳氏芳林內外傳攷正。段氏若膺說文注。皆爲陸氏釋文所惑。而以能字爲是熊字爲非。故具論之。

陟恪

叔父陟恪在我先王之左右。以佐事上帝。杜注曰。陟。登也。恪。敬也。大雅文王集傳引或說曰。陟。恪。當爲陟降。引之謹案。恪讀爲格。爾雅曰。格。陟。登。陞也。是格與陟同義。

陟格謂魂升於天也。既言陟而又言格者，古人自有複語耳。莊子德充符篇：彼且擇日而登假。大宗師篇：是知之能登假於道也。若此，假與格同。格亦登也。楚辭離騷：陟陛皇之赫。格與恪古字通。論語爲政篇：有恥且戲兮。陟亦陞也。格漢山陽太守祝睦碑：格作恪。後漢書班固傳：用討韋顧黎崇之不格。文選：格作恪。逸周書小開武篇：罔有恪言。卽格言也不必改爲陟降。

不能相禮

孟僖子病不能相禮。釋文作病不能禮。日本或作病不能相禮。臧氏玉林經義雜記曰：傳文本無相字。故注云不能相儀。荅郊勞以此爲已病。傳如本有相字。文義已

明杜可無不能相儀之法矣。且下云苟能禮者從之。不能禮正與能禮相對。唐時本已衍相字。陸氏不從是也。惠氏定宇補注曰。相字蓋襲上文相儀而誤引之。謹案臧惠二說是也。古者謂習於禮曰能禮。周語晉侯其能禮矣。是其證。上文公如楚。鄭伯勞于師之梁。孟僖子爲介。不能相儀及楚。不能荅郊勞。是不能者。相儀與荅郊勞二事。故總言之曰不能禮。如曰不能相禮。則專指相儀言之。遺卻荅郊勞一事矣。史記孔子世家索隱曰。左傳云孟僖子病不能禮。乃講學之病者。不能禮爲病。非疾困之謂也。據此則司馬貞所見本亦無相字。今索隱

病不能下有相字。乃後人據俗本左傳增之也。觀索隱曰：不能禮爲病，足證所引傳文無相字矣。王肅家語正論篇注曰：僖子病，不知禮文，雖小異而亦無相字。又案上文不能答郊勞，下注曰爲下僖子病不能相禮，張本相字亦後人所增。藝文類聚人部六引傳文正作病不能禮，無相字。

聖人之後 聖人有明德者

吾聞將有達者曰：孔某聖人之後也。而滅於宋服虔注曰：聖人謂商湯。見史記孔子世家集解杜預注及王肅家語注並同。下文曰：臧孫紇有言曰：聖人有明德者，若不當其

後必有達人。杜注曰：聖人之後有明德而不當大位，謂正考父。家語觀周篇改其文曰：聖人之後，若不當世，則必有明德而達者。易王注曰：弗父何，殷湯之後而不繼世爲宋君。史記孔子世家亦改其文曰：吾聞聖人之後雖不當世，必有達者。引之謹案：聖人謂弗父何，正考父也。聖人之後，謂孔子爲弗父考父之後，故下文遂曰：其祖弗父何以有宋而授厲公。及正考父佐戴武宣三命，茲益其此言其祖之有明德而爲聖人也。故下文遂曰：聖人有明德者，若不當世，其後必有達人。此言弗父考父德爲聖人而不當世，其後必有達人也。曰：聖人曰聖

人有明德者皆指弗父考父言之故篇內無一語及商湯者解者誤以聖人爲商湯湯有天下不得謂之不當也於是改易其文曰聖人之後雖不當世必有達者幸就其說曰聖人之後有明德而不當大位謂正考父或曰弗父何殷湯之後而不繼世爲宋君不知聖人有明德者聖人卽謂弗父考父不必加之後二字也聖人卽是有明德者古人自有複語耳襄二十四年傳僑聞君子長國家者君子卽是長國家者也且下文方言其後何得亂其次序邪以弗父考父爲聖人者聖爲明德之通稱不專指大聖逸周書謚法篇曰稱善賦簡曰聖敬實厚禮曰聖鄉飲酒義曰仁義接賓主有事且豆有數曰聖管子四時篇曰使能之謂明聽信之謂聖賈子道術篇曰且明且賢此謂聖

人察舊日人之彥聖。緇衣引君陳曰。既見聖。亦不克由聖。小雅正月曰。其日予聖。小閔曰。或聖或否。大雅板曰。靡聖管管。齊語曰。卑聖侮士。越語曰。聖人不出。忠臣解胥。皆明德之通稱也。襄二十二年傳。勇用聖人。正義曰。周禮大司徒以鄉三物教萬民。一曰六德。知仁聖義中和。鄭元云。聖通而先識也。尚書洪範云。睿作聖者。通識之名。尚書又稱惟狂克念作聖。惟聖罔念作狂。詩弗父稱人之濟聖。皇父孔聖。母氏聖善。皆非大聖也。弗父之讓考父之其其有明德如是。得不謂之聖人乎。固不必商湯而後爲聖也。敘孔子之先。而但及弗父考父者。舉其近者言之耳。若欲舉其遠者。則湯之先更有契爲聖人。不得以湯爲始也。韓詩外傳曰。受命者必以其祖命之。孔子爲魯司寇。命之曰。宋公之子弗甫有。孫曰孔某。命爾爲司寇。彼敘孔子之先。亦但及弗父而止。是其

例也

官職不則

六物不同民心不壹事序不類官職不則同始異終何
可常也杜解官職不則曰治官居職不一法引之謹案
則猶等也均也說文則等畫物也是則與等同義管子
七法篇曰物雖不甚多皆均有焉而未嘗變也謂之則
呂氏春秋功名篇曰取則行鈞均鈞古字通是則與均亦同
義官職不則謂賢否不同也六物不同民心不壹事序
不類官職不則同也壹也類也則也皆謂同也不同不
壹不類不則皆謂異也故曰同始異終也杜訓則爲法

而又云不一法以牽合土三句之義其失也迂矣。

樂

九年傳晉侯飲酒樂釋文樂音洛引之謹案樂當如字

讀謂平公飲酒而樂作也。

古者謂作樂爲樂故檀弓云是月禴從月樂

下文

屠敵酌以飲工曰辰在子而謂之疾日君徹宴樂女弗

聞而樂是不聰也。正指此樂字而言檀弓載此事云平

公飲酒鼓鍾杜蕢曰。

即屠敵。

子而謂之疾日君徹宴樂是其明證矣此與

元年鄭伯宴趙孟飲酒樂不同釋文音洛非也檀弓忌

日不樂說者亦誤讀爲哀樂之樂辯見檀弓。

孤斬焉在衰經之中

十年傳孤斬鬻在衰經之中杜注曰既葬未卒哭故猶服斬衰引之謹案斬讀爲慙慙鬻者哀痛憂傷之貌音語曰吾君慙鬻其亡之不恤而羣臣是憂是也桓引者吾子儼然在憂服之中語意與此相似慙之言慙也說文慙痛也小雅雨無正篇慙慙日瘳鄭箋曰慙慙憂之楚辭九辯慙悽增欷王逸注曰愴痛感動歎累息也古聲慙慙相近洪範沈潛剛克文五年傳潛作漸是其例矣杜不得其解而臆爲之說非是。

貌不道容

十一年傳今單子爲王官伯而命事於會視不登帶言

不過步貌不道容而言不昭矣。引之謹案貌不道容貌當爲視。此涉土文容貌而誤。自唐石經已然。而各本皆從之。漢書五行志作貌。亦後人依誤本左傳改之。案上文云會朝之言必聞於表著之位。所以昭事序也。視不過結綯之中。所以道容貌也。單子視不登帶則不能道容貌矣。故云視不道容言不過步則不能昭事序矣。故云言不昭。上下皆以言視對文。今本視作貌則與上文不合。且貌卽容也。今云貌不道容則是容不道容矣。此必當依上文改正。

是四國者

十二年傳。是四國者。專足畏也。杜注曰。四國。陳蔡二不
羹。劉先伯規過曰。楚語云。靈王城陳蔡不羹。使僕夫子
皙問於范無宇曰。今吾城三國。賦皆千乘。亦當晉矣。諸
侯其來乎。對曰。是三城者。豈不使諸侯之惕息。彼再言
三城。無四國也。古四字積畫。四當爲三。錢氏荅問曰。賈
子書大都篇云。楚靈王問范無宇曰。我欲大城陳蔡葉
與不羹。賦車各千乘。馬亦足以當晉矣。又加之以楚諸
侯其來朝乎。范無宇曰。不可。臣聞大都疑國。大臣疑主。
今大城陳蔡葉與不羹。或不充。不足以威晉。若充之以
資財。實之以重祿。之臣是輕本而重末也。臣聞尾大患

掉。末大必折。終爲楚國大患者。必此四城也。靈王弗聽。果城陳蔡葉與不羹。居數年。陳蔡葉與不羹奉公子棄疾內作難。然則左氏傳云四國者。兼葉言之。昭十三年傳。稱陳蔡不羹許葉之師。葉本許都。靈王遷許於城父。而取其地。故有許葉之稱。十一年十二年傳。但稱陳蔡不羹。而不及葉者。傳寫之脫文。杜不審。而分不羹爲二。以當之誤矣。當時實有四城。改四爲三。亦非其實。引之謹案。十一年傳。楚子城陳蔡不羹。與此相應。則無脫文可知。楚語曰。靈王城陳蔡不羹。又曰。陳蔡及不羹人納棄疾。史記楚世家亦曰。今吾大城陳蔡不羹。陳蔡下皆

無葉字。豈得盡謂之脫文乎。陳蔡不羹實三國。故楚語

既言三國。又言三城。而此言四國者。涉上文兩四國字

而誤。上文曰。四國皆有。鄭注。覲禮四享曰。四當爲三。古

書作三四。或皆積畫。此篇又多四字。字相似。由此誤也。

正與此同。周官內宰疏引鄭志。荅趙商曰。天子巡守禮。制丈八尺。純四狹。四當爲三。古三四積畫是

以三誤。劉說是也。特以納棄疾者。亦有葉邑之師。故後

世傳聞之誤。遂謂靈王所城者。亦有葉。賈子書所云者

是也。以十一年杜注考之。不羹城在今襄城縣東南。漢書

地理志。潁川郡雖有東西二不羹。然杜注及土地名。竝云。襄城縣東南有不羹城。定陵縣西北有不羹亭。定陵之不羹。有亭而無城。則非靈王所城者也。傳所謂大城不羹。其爲襄城縣之不羹城無疑。水經汝水注亦云。汝

水又東南。逕襄城縣故城南。又東南逕東不羹城南。引春秋傳大城陳蔡不羹爲證。而西不羹亭。則僅見於水注中。不引陳蔡不羹相距或二三百里。或三四百里。春秋傳爲證。而今之襄城。南距葉縣六十里。古葉邑卽在葉縣南三十里。與襄城東南之不羹城。相距不及百里。襄城之不羹已大城矣。未百里而又城葉。無是理也。學者當據內傳以正賈子之誤。何反據賈子以疑左氏乎。十三年傳言許葉之師者。案傳曰。棄疾君陳蔡。城外屬焉。楚世家作方城外。十八年傳曰。葉在楚國。方城外之蔽也。則葉固方城外之邑。屬於棄疾者。葉人之從棄疾。宜也。奚必靈王所城者而後爲之用乎。且傳不言陳蔡許葉不羹。而

言陳蔡不義許葉。明陳蔡不義。是靈王所城之大都。而
許葉則否。故先言陳蔡不義。後言許葉。而楚語則但言
陳蔡。及不義人納棄疾。不言許葉也。若謂葉本許都。故
有許葉之稱。則尤非事實。十三年傳曰。楚子遷許而質
許圍。故許圍作亂。又曰。師陳蔡不義。許葉之師。囚四族
之徒。以入楚。杜注。四族。蒧氏。許圍。蔡消。莫成然。是許國之師。實許圍所
召也。九年遷許於夷。遷方城外。人於葉。十一年又遷許
於荊。見十三許與葉皆受蕩析離居之害。遂叛靈王而
從棄疾。故曰。師陳蔡不義。許葉之師。許謂遷荊之許。非
謂葉也。許已遷夷。遷荊。何得仍謂葉爲許乎。葉本楚邑。

自許遷於葉。遂謂葉爲許。九年傳遷許于夷。遷方城外
人于許。杜注曰。成十五年許遷於葉。因謂之許。是也。然
言許則不言葉矣。自許遷夷。遷荊而舊所居之葉。仍歸
於楚。而謂之葉。後凡言葉公。及沈諸梁老于葉。皆是也。
然言葉則不言許矣。未聞因葉本許都而稱許葉也。假
令納棄疾者。但有葉邑之師。而無遷荊之許。則傳但言
葉可矣。何必謂之許葉乎。許爲楚之附庸。葉爲楚之邑。
不得合許葉爲一。以強附於賈子書之葉也。近世說此
條者。若顧氏亭林。臧氏玉林。陳氏芳林。皆誤引賈子爲
據。而錢氏復謂左傳之許葉。卽賈子之葉。故具論之。

形民之力

形民之力而無醉飽之心杜注曰言國之用民當隨其力任如金冶之器隨器而制形故云形民之力去其醉飽過盈之心引之謹案杜釋形字迂回難通今案形當讀爲刑後漢書陳蕃傳注引此正作刑民之力刑猶成也見大傳學記鄭注刑民者成民也桓六年傳聖王先成民而後致力於神正義曰言養民成就然後致孝享是其義也之猶是也爾雅之子者是子也無逸惟耽樂之從漢書鄭崇傳引作惟耽是從力猶務也見坊記鄭注形民之力而無醉飽之心者言惟成民是務而無縱欲之心也犬雅烝民篇威儀是力文義正與此

同之曰廣雅曰。刑治也。刑民之力者。治民是務也。

子母勤 祇取勤勞

十三年傳。平王使枝如子躬聘于鄭。且致驪櫟之田。事畢。弗致。既復。王問驪櫟降服而對曰。臣過失命。未之致也。王執其手曰。子母勤。姑歸家。大人曰。勤猶辱也。以其降服而對。故曰子母辱。成十七年。晉厲公使辭于欒書。中行偃曰。大夫無辱。其復職位。語意與此相似。正義曰。言子母以見使爲勤勞。失之矣。定四年。晉謀伐楚。荀寅言於范獻子曰。吾自方城以來。楚未可以得志。祇取勤勞。亦謂祇取辱也。昭十三年。楚靈王曰。大福不再。祇取

辱罵語意亦相似。鄭注檀弓曰：勤勞辱之事也。成九年穆姜謂季文子曰：大夫勤辱，是勤與辱同義。

曰義也夫。猶義也夫。

十四年傳：三數叔魚之罪，不爲末滅。曰義也夫。又殺親。

益榮，猶義也夫。引之謹案曰：當爲由字之脫誤也。猶讀

爲由字之假借也。

莊十四年傳猶有妖巫正義曰：由有妖蛇而厲公得入乎。古者由猶二宅。

義得通用。犬戴禮保傳篇猶此觀之。莊四年公羊傳紀侯之不誅至今有紀者猶無明天子也。孟子公孫丑篇文王猶方百里起猶並與由同。家語正論篇載此猶正作由，則曰字亦

當作由。寫者脫一直畫耳。由義行義也。

孟子盡心篇言曰：居仁由義。

大義滅親，叔向能行大義，故不爲末滅也。再言由義也。

夫所以歎歎美之雜記引孔子之言曰如知此者由文
矣哉由文矣哉正與由義也夫之文相類又仲尼燕居
論夔曰古之人也終又曰古之人也又孔子贊禹曰禹
吾無閒然矣終又曰禹吾無閒然矣美顏回曰賢哉回
也終又曰賢哉回也重言嗟歎是其例也杜注曰義也
夫云於義未安注猶義也夫云以直傷義故重疑之失
之矣服虔讀咸爲咸下屬爲句亦不辭由義也夫乃孔
子歎美之辭不得屬之獄人而云咸口也王肅家語用
左傳文而承誤作曰又治服虔之解而以咸屬下讀於
爲末下注曰末薄也於或曰非也
義下注曰或左傳作咸也

非無賄之難 非不能事大字小之難

十六年傳僑聞君子非無賄之難立而無令名之患僑聞爲國非不能事大字小之難無禮以定其位之患正義曰僑聞君子非無賄之難家貧無貲不爲難也立於職位而無善名是爲身之大患言韓子當患無令名不宐患家無貲也僑聞爲國家者非不能事大字小之難事大國愛小國不爲難也無禮以定其位是國之大患言鄭當患位不定不宐患事晉之難也引之謹案正義以難爲難易之難非也傳言非不能事大字小之難正義乃曰事大國愛小國不爲難則遺卻不能二字矣今

案難亦患也。之是也。言君子非無賄是患。而無令名是患。爲國非不能事大字小是患。無禮以定其位是患也。襄二十四年傳。僑聞君子長國家者。非無賄之患。而無令名之難。彼言無賄之患。此言無賄之難。彼言無令名之難。此言無令名之患。是難卽患也。昭元年傳。吾不能是難。楚不爲患。意亦與此同。十年傳。忠爲令德。其子弟能任。非猶及之難。不愼也。難亦患也。言高彊之所以及於罪者。患在不愼也。正義曰。言人居其難。可不謹慎。亦失之。晉語曰。吾欲作大事。而難三公子之徒。如何。之徒二字言患三公子皆得立也。又曰。君旣許我殺大子。

衍說見國語

而立奚齊矣。吾難里克，奈何？言患里克不從也。又曰：愛
糞土以毀三常，失位而闕歌，是之不難，無乃不可乎？言
是之不患也。襄十七年傳是之孟子離婁篇於禽獸又
何難？言於禽獸又何患也。故其下文云：無一朝之患
也。古人多謂患爲難，互見前宋衛實難下。

大城城父

十九年傳：費無極言於楚子曰：晉之伯也，適於諸夏，而
楚辟陋，故弗能與爭。若大城城父而寘大子焉，以通北
方，王收南方，是得天下也。杜注曰：城父，今襄城父城縣。
謂卽晉時襄城郡之父城縣。各本父惠氏補注曰：高誘
城二字誤倒。今據水經汝水注改正。

日城父楚北境之邑今屬沛國

見呂氏春秋
慎行篇注

引之謹案

二十年傳賈無極曰建與伍奢將以方城之外叛以今
輿地考之方城山在葉縣南四十里父城故城在寶豐
縣西北自寶豐縣東南至葉縣六十八里又四十里而
至方城山則父城故城當在方城西北百餘里正所謂
方城之外也故無極謂其將以方城之外叛若沛國之
城父其故城在今亳州東南去葉縣南之方城遠矣勢
不能以方城之外叛無極安得而誣之乎自高誘誤以
沛國之城父爲大子建所居而闕駟十三州志見史記正義
史記楚世家正義並同其誤惠氏不能釐正而反用其

說以規杜。非也。

札瘥天昏

寡君之二三臣。札瘥天昏。賈逵注曰。短折曰天。未名曰昏。家大人曰。昏之言泯沒也。臬陶謨。下民昏墊。鄭注曰。昏沒也。傳曰。寡君之二三臣。若未名而外。不得謂之臣矣。晉語曰。晉侯將外矣。君子失心。鮮不天昏。晉侯亦非未名而外者也。昭二十年傳。所以天昏孤疾者。周語然則無天昏札瘥之憂。義竝同也。

私族於謀

其一二父兄懼隊宗主。私族於謀而立長親。杜注曰。於

私族之謀。立親之長者。引之謹案。傳言私族於謀。不言於私族之謀。杜說非也。私族於謀而立長親者。私謀於族而立長親也。倒言之。則曰私族於謀矣。十一年傳。王貪而無信。唯蔡於感。言唯憾於蔡也。本年傳。諺所謂室於怒。市於色者。言怒於室。色於市也。又義竝與此相似。

棠君尙

二十年傳。棠君尙謂其弟員曰。釋文。棠君尙。君或作尹。引之謹案。作尹者是也。杜注曰。棠君者。之長子尙也。爲棠邑大夫。廣韻。棠作堂。引風俗通曰。堂楚邑。大夫五尙。

爲之其後氏焉。尙爲棠邑大夫。則是縣尹也。其當作尹明甚。棠尹。猶言箴尹。沈尹連尹耳。杜注棠君。亦當作棠尹。爲棠邑大夫。故謂之棠尹也。或謂注曰棠尹。奢之長子尙也。則傳文本無尙字可知。若傳已稱其名曰棠尹。尙則注當云棠尹尙奢之長子也。必不更贅其名曰奢之長子尙矣。案此注內棠尹下脫尙字。非傳文衍尙字也。棠尹尙奢之長子尙也。重一尙字。猶襄十年傳注。邾人紇。叔梁紇也。重一紇字。釋文正作棠君尙。或說非。

親戚

親戚爲戮。不可以莫之報也。家大人曰。親戚。謂其父也。

錢氏曉徵史記攷異曰。五帝紀堯二女不敢以貴驕事舜親戚。甚有婦道。正義云。親戚謂父瞽叟後母弟象妹。顓首等也。案古人稱父母爲親戚。大戴記曾子疾病篇。親戚既沒。雖欲孝。誰爲孝。孟子盡心篇。人莫大焉亾親戚。君臣上下。楚世家。楚人皆憐之。如悲親戚。猶言如喪考妣也。孟嘗君列傳。使使存問。獻遺其親戚。亦謂其父母也。正義兼弟妹言之。非史公之旨。家大人曰。錢說是也。余請爲之加證。管子揆度篇曰。夫城郭拔。社稷不血食。無生臣親沒之後。無亾子。此社稷之所重於親戚者也。輕重乙篇曰。其有親戚者。必遺之酒四石。肉四鼎。其

無親戚者必遺其妻子酒三石肉三鼎晏子外篇曰今爲人子而離散其親戚孝乎哉墨子兼愛篇曰奉承親戚提挈妻子而寄託之節葬篇曰楚之南有炎人之國者其親戚外其肉而棄之然後埋其骨迺成爲孝子秦之西有儀渠之國者其親戚外取柴薪而焚之熏土謂之登遐然後成爲孝子非命篇曰內不能善事其親戚外不能善事其君長呂氏春秋遇合篇曰人有大舅者其親戚兄弟妻妾無能與居者恃君篇曰無親戚兄弟夫妻男女之別史記陸賈傳曰足下中國人親戚昆弟墳墓在真定皆謂父母爲親戚也又案左傳親戚爲

義史記楚世家作父義。管子九變篇親戚墳墓之所在。
小問篇作父母墳墓之所在。墨子天志上篇然且親戚
兄弟所知識共相儆戒。下篇作然且父以戒子。兄以戒
弟。荀子議兵篇其民之親我歡若父母。漢書刑法志作
歡若親戚。賈子保傳篇無恩於親戚。大戴禮作無恩於
父母。此尤其明證也。

鄙

余姑爲之求士而鄙以待之。家大人曰。古謂野爲鄙。鄙
以待之。謂遐處於野以待之也。故下文又言耕於鄙。僖
二十四年傳。鄙在鄭地汜。杜彼往訓。鄙爲野是也。此注

以爲遘鄙失之呂氏春秋晉時篇史記吳世家五子胥
傳竝作耕於野

桓十一年公羊傳遘鄭焉而野
賈鄭仲師大司徒注引作鄙

琴張字子開名牢

琴張聞宗魯死將往弔之杜注曰琴張孔子弟子字子
開名牢正義曰家語云孔子弟子琴張與宗魯友七十
子篇云琴牢衛人字子開一字張則以字配姓爲琴張
卽牢曰子云是也賈逵鄭眾皆以爲子張卽顓孫師服
虔云案七十子傳云子張少孔子四十餘歲孔子是時
四十知未有子張引之謹案賈鄭一家之說固無明徵
王肅家語亦不足信家語序曰語云牢曰子云吾不誠

故藝議者不知爲誰多矣爲之說孔子家語弟子有琴張一名牢字子開亦字張衛人也是琴張名牢乃王肅之臆說僞託於家語者杜氏不察而用之疏矣此及孟子盡心篇作琴張莊子大宗師篇作子琴張無作琴牢者論語子罕篇牢曰鄭注以牢爲子牢蓋據莊子則陽篇長梧封人問子牢之文司馬彪注以子牢爲琴牢亦爲家語所誤然亦不以爲琴張牢與琴張不得合而爲一也漢書古今人表有琴牢亦當作琴張後人據家語改之也王肅家語未出以前不得有琴張名牢之說辨見漢書

齊侯疥遂疔

陸氏釋文曰疥舊音戒梁元帝音該依字則當作疥說
文云兩日一發之瘡也疥又音皆後學之徒僉以疥字
爲誤案傳例因事曰遂若疥已是瘡疾何爲復言遂疔
乎家大人曰陸說是也晏子春秋諫篇曰景公疥且瘡
疥之與瘡不同病故加且字以別之若讀疥爲疥則疥
卽是瘡豈有重複其義而言瘡且瘡者乎況疥字古音
在祭部疥字古音在之部二部之字絕不相通若果是
疥字無由誤爲疥也顏之推孔穎達以讀疥爲是
顏說
氏家
訓
皆由昧於古音故爲曲說所惑耳

偏介之關

縣鄙之人入從其政偏介之關暴征其私杜注曰介隔也迫近國都之關言違鄙既入服政役又爲近關所征稅杆暴奪其私物引之謹案偏介本作偏介今俗作介卽邇字也偏介二字義本相近襄二十九年傳云邇而不偏是也注本作介近也迫近國都之關迫近二字正釋偏介二字則正文之本作偏介明矣祇因介與介字形相似故介以爲介而注文之介近也亦誤爲介近也後人以介無近義而有隔義故改近也爲隔也以牽合介字不知偏與介隔義不相近不得言偏介之關且注云迫近國都之關又云爲近關所征稅皆承上近也二字

言之若改近也爲隔也則全注皆不可通矣陸孔所見
已是誤本故陸云介音界孔又曲爲之說云迫近國都
爲關以隔遄鄙之人則讀注不審而爲誤本所惑也晏
子春秋外篇作偁介之關亦後人依左傳改之案晏子
諫篇云貴戚不薦善逼邇不引過問篇云佞人求君逼
爾而陰爲之與爾亦與邇同又云左右偁邇晏子書言偁邇
者多矣唯此一處作偁介與本書不合故知爲後人所
改也凡經傳中邇字作介者多誤而爲介說見穀梁傳
莊十五年

取人於萑苻之澤

鄭國多盜取人於萑苻之澤杜注曰於澤中劫人引之

謹案劫人而取其財不得謂之取人取讀爲聚

聚古通作取萃

象傳聚以正也釋文聚有作取漢書五行志內取茲謂禽師古曰取讀如禮記聚應之聚

人卽盜也

謂羣盜皆聚於澤中非謂劫人於澤中也盜聚於澤中

則四出劫掠又非徒於澤中劫人也下文云興徒兵以

攻萑苻之盜盡殺之則此澤爲盜之所聚明矣文選齊

故安陸昭王碑文注藝文類聚治政部上白帖九十一

太平御覽治道部三引此竝作聚人於萑苻之澤蓋從

服虔本也杜本作取者借字耳而云於澤中劫人則誤

謂爲取與之取矣韓子內儲說篇鄭少年相率爲盜處

於萑澤將遂以爲鄭禍處於萑澤卽所謂聚人於萑苻之澤也

古之遺愛

及子產卒仲尼聞之出涕曰古之遺愛也杜注曰子產見愛有古人之遺風家大人曰愛卽仁也謂子產之仁愛有古人之遺風非謂其見愛於人也以子產爲古之遺仁猶以叔向爲古之遺直耳史記鄭世家集解引賈逵注曰愛惠也惠亦仁也故廣雅曰惠愛仁也

廷求枉反

二十一年傳子無我廷不幸而後亾杜注曰廷恐也釋

文廷求枉反恐也引之謹案求本作邱漢人改之也廷

之本訓爲往來之往

廷于放切說文廷往也從辵王聲引春秋傳日子無我廷蓋謂左傳

僭用廷字非謂其訓爲往也訓往則義不可通

僧以爲恇懼之恇恇有邱往反

之音

邱往與邱枉同

禮器眾不匡懼鄭注曰匡猶恐也釋文匡

作恇音匡又邱往反是也廷訓爲恐則與恇同故亦音

邱枉反若音求枉反則當訓爲誑欺不得訓爲恐矣鄭

風揚之水篇人實廷女釋文廷求枉反誑也定十年傳

是我廷吾兄也釋文廷求往反欺也與音邱往反而訓

爲恐者不同淺人習見廷字有求枉反之音輒改邱爲

求而不知字雖同而音義則異也段氏說文注謂人實

迂女之迂爲証之假借是也而謂子無我迂之迂亦同則非也子無我迂乃恒之假借言子母以是言恐懼我今日之事不幸而後从亾幸猶不亾也豈証之假借乎

問于介眾

二十四年傳晉侯使士景伯涖問周故士伯立于乾祭而問于介眾杜注曰乾祭王城北門介大也釋文介音界引之謹案言眾則周之國人胥在是矣無取更言大也書傳亦無謂國人爲介眾者介疑當作方方古其字詳見周禮六鄉之治下問于其眾者問于周之眾庶也方與介字形相似故誤爲介杜所見本已然

莫

日過分而陽猶不克克必甚能無旱乎陽不克莫將積
聚也杜注曰陽氣莫然不動乃將積聚釋文曰陽不克
莫絕句引之謹案陽不克莫甚爲不辭莫然不動之解
亦爲皮傳今案陽不克絕句莫當作其下屬爲句言陽
氣不克其將積聚而爲旱也其莫字形相似故其譌作
莫賈子道德說篇其生氣皆集焉檀弓注而漢書五行
志引傳文已作莫蘇林注亦曰莫莫爾不勝爲積聚也
則此字之譌其來久矣

用成周之寶珪于河

王子朝用成周之寶珪于河唐石經此行凡九字比各行少一字周之寶珪四字係改刻釋文云于河本或作沈于河陳氏芳林攷正曰案史記周本紀正義引左傳云子朝用成周之寶珪沈於河漢書五行志作王子鼂以成周之寶圭湛于河

湛古沈字說文湛沒也

是石經刊去者乃

沈字也家大人曰有沈字者是也用寶珪沈于河與用兩珪質于河文同一例

見襄三十年

用猶以也故漢志作以

成周之寶圭湛于河若無沈字則文不成義觀禮曰祭川沈襄十八年傳中行獻子獻於河沈玉而濟定三年傳蔡侯歸及漢執玉而沈皆其證也釋文以無沈字者

爲正本唐石經刊去沈字卽因釋文而誤水經河水注
云子朝取周之寶玉沈河以祈福則善長所見本亦有
沈字白帖六七兩卷並引作沈于河與史記正義同皆
不從釋文也

五牲三犧

二十五年傳爲六畜五牲三犧以奉五味服注曰五牲

麋鹿熊狼野豕三犧雁鴛雉也

見正義

杜注曰六畜馬牛

羊雞犬豕五牲麋鹿麋狼兔三犧祭天地宗廟三者謂
之犧引之謹案麋鹿之屬可謂之獸不可謂之牲牲家
物也獸野物也特牲饋食禮實獸于俎上東首牲在其

西北首東足內則三牲用菽獸用梅是獸與牡異不得以獸爲牲也曰六曰五曰三皆以物類言之非以所用之事言之且月令季冬乃命大史次諸侯之列賦之犧牲以共皇天上帝社稷之饗命宰歷卿大夫至於庶民土田之數而賦犧牲以共山林名川之祀則犧牲所用亦有社稷山川何必祭天地宗廟而後謂之犧乎地官牧人掌牧六牲而阜蕃其物凡祭祀其其犧牲鄭注曰六牲謂牛馬羊豕犬雞也則犧牲卽在大畜之內不得以雁鶩雉當之矣今案五牲牛羊豕犬雞也三犧牛羊豕也大戴禮曾子天圓篇序五牲之先後貴賤諸侯之

祭牲牛曰大牢

牛下蓋脫
羊豕二字

大夫之祭牲羊曰少牢

羊下蓋脫

豕士之祭牲特豕曰饋食

日字蓋因上下文
而衍說見大戴禮

宗廟曰芻

祭山川曰犧牲割列禋瘞是有五牲盧辯注曰五牲牛

羊豕犬雞也諸志篇夫禮會其四時四孟四季五牲五

穀順至必時其節月令春食麥與羊夏食菽與雞中央

土食稷與牛秋食麻與犬冬食黍與彘所謂五牲五穀

也三犧卽三牲牲之爲大牢少牢者也桓八年公羊傳

何注牛羊豕凡三牲曰大牢羊豕凡二牲曰少牢是也

蒼之則曰畜用之則曰牲色純則曰犧以牢禮言之則

有三合雞犬計之則爲五合馬計之則爲六其實一也

僖十九年傳古者六畜不相爲用昭十一年猶下文之傳五牲不相爲用則五牲卽在大畜之內矣五章五色合元計之則爲六采五聲合變宮變徵計之則爲七音目服杜二家皆失之

季郈 郈氏 郈昭伯 郈孫

引之謹案昭二十五年傳言季郈者一言郈氏者二言郈昭伯者二言郈孫者四郈字皆當作后后者厚之俗字也

說文厚古文作
厶厶與后同

潛夫論志氏姓篇曰魯之公族有

后氏檀弓后木鄭注曰后木魯孝公子惠伯輩之後正義曰世本孝公生惠伯革其後爲厚氏世本云革此云鞏世本云厚此云后其字異耳呂氏春秋察微篇魯季

氏與后氏闕

今本后作卽後人依俗本左傳改高注之也據注以字爲氏則作后明矣

曰后氏魯孝公子惠伯革之後也以字爲氏因曰后氏

蓋惠伯革字厚厚與后通惠伯革之孫以王父字爲氏

故其後爲后氏又謂之后孫猶公子彊字子臧

見隱五年傳正

義而其後爲臧孫公子督字華父而其後爲華孫也

華孫

見文十襄十四年傳公使厚成叔弔于衛厚孫歸復命

厚孫卽后孫也厚成叔亦惠伯革之後

呂氏春秋觀表篇高注曰后成

子魯大夫也后敬子國之子魯語革故稱后孫厚成叔

注曰后敬子魯大夫后惠伯之元孫風俗通義過譽篇作后成叔文選幽憤詩注引左傳同

后昭伯漢書古今人表作厚昭伯史記魯周公世家索

隱曰系本昭伯名惡魯孝公之後稱厚氏五行志昭公
二十五年劉歆以爲時后氏與季氏有隙或書其本字
或書其偕字皆是也若郈則叔孫氏之邑而非惠伯革
之字不得爲昭伯所受之氏臧孫之臧華孫之華豈可
以爲邑名乎后旁加邑蓋傳寫者之誤也

襄十四年厚成叔釋文厚

本或作郈案

郈亦當作后而元和姓纂引風俗通曰魯大夫郈昭伯

食木於郈因氏焉已誤以后孫之后爲郈邑之郈食采
於郈者叔孫氏非后氏也水經汶水注曰無鹽縣之郈
鄉魯叔孫昭伯之故邑也禍及鬬雞矣又誤以后昭伯
爲叔孫昭伯蓋叔孫氏食邑於郈后昭伯之后誤本又

作邱因相涉而生錯謬矣

宣王有志 失志爲昏

二十六年傳諸侯釋位以間三政宣王有志而有於目

九經古義曰鄭康成周禮注二志古文識

保章氏

有志謂

長而有知識也王伯厚以爲有撥亂之志恐非外傳曰

宣王長而立之疑之亂宣王尚少至始有知識乃授之

政也引之謹案惠說是也大戴禮係傳篇成王有知而

選大公爲師周公爲傅彼言成王有知猶此言宣王有

志也哀公問曰寡人蠢愚冥頑子志之心也鄭注曰志

讀爲識識知也子之心所知也緇衣曰爲上可望而知

也爲下可述而志也。注曰：志猶知也。墨子非命中篇不
志咎也。三代之聖善人與意亡咎。三代之暴不肖人也。
下篇志作識。識亦知也。楚辭天問：師望在肆，昌何志？王
注曰：言大公在市肆而屠，文王何以志知之也。志知卽
識知
是志與知同義。志爲知識之知。又爲血氣心知之知。音
智
哀十六年傳：禮失則昏，名失則愆。失志爲昏，失所爲愆。
志謂心知也。言哀公之失禮由於自失其心知，故曰失
志爲昏也。列子湯問篇：女志彊而氣弱，故足於謀而寡
於斷。張湛注曰：志謂心智。

以聞先王

單劉贊私立少以閒先王杜注曰閒鎔先王之制引之

謹案閒之言干也謂干犯先王之命也

昭二十年傳曰臣敢貪君賜以

干先

王先王之命卽上文所云王后無適則擇立長年鈞

以德德鈞以上是也襄十九年傳閒諸侯難太平御覽

皇親部十二引服虔注曰閒犯也是閒與干同義上文

曰王室其有閒王位謂干王位也

昭三十一年傳曰況敢干位以作大事乎

襄十一年傳曰或閒茲命謂干茲命也

襄三年傳曰定使于大命

四年傳曰管蔡啟商忌閒王室謂謀干王室也

說見後甚閒王

下哀二十年傳曰吳犯閒上國多矣謂犯干上國也鄭

語曰姜嬴荊平實與諸姬代相干也韋注曰言更相犯

閒也閒與干聲相近故字亦相通聘禮記皮馬相閒鄭注曰古文閒作干是也。

官宿其業 物乃坻伏

二十九年傳官宿其業其物乃至若泯弃之物乃坻伏
鬱湮不有杜注曰宿猶安也正義曰夜宿所以安身故
云宿猶安也謂安心思其職業服虔云宿思也今日當
預思明日之事如家人宿火矣劉元卿以服義太迂曲
引之謹案服訓宿爲思杜訓爲安皆於古無據且皆與
下句不貫孔謂安心思其職業則尤爲迂曲今案宿讀
爲𠂔𠂔古文夙字也說文夙早敬也從夊夕夊讀若載
持也今本

說文晚夕字持事雖夕不休早敬者也隸變作夙說文依段注補。

又云夙古文夙。又云肅持事振敬也。夙夙肅古今字。作

宿者借字耳。賈子係傳篇有司肅肅端冕大戴記作夙

通作宿也。言居官者能敬脩其業其所掌之物乃至也

上文云物有其官官脩其方又云董父甚好龍能求其
者欲以飲食之龍多歸之正謂此也。

杜解物乃坻伏云坻止也釋文坻音旨又丁禮反正義

曰若滅弃所掌之事則其物乃止息而潛伏家大人曰

杜孔分坻伏爲二義非也坻讀爲政政隱也言滅弃其

業而不脩則所掌之物乃隱伏而不出也廣雅政隱也

曹憲音丁禮反王褒四子講德論雷霆必發而潛底震動潛底猶潛隱也馬融廣成頌疏越蘊惱駭洞底伏底伏猶隱伏也坻底竝與改通論衡龍虛篇引左傳坻作低低伏亦隱伏也故咸虛篇又云夏末政衰龍乃隱伏

易之亾也

范氏中行氏其亾乎中行寅爲下卿而干上令擅作刑器以爲國法是法姦也又加范氏易易之亾也杜注曰范宣子刑書中旣廢矣今復興之是成其咎正義引劉炫曰范氏取蒐之法以爲國制雖則爲非書已廢矣縱應有禍亾豈已歇今荀寅更述其事又加增范氏之惡

焉。范氏已欲免禍。今復改易之而使凶家大人曰。杜劉

孔三君皆未曉易字之義而強爲之詞。非傳意也。孔氏

經學卮言讀易爲難易之易亦非。今案易之凶也四字作一句讀易者。

疾也。速也。言中行寅擅作刑器以召禍。又加以范氏之

舊惡。是速之使凶也。史記天官書填星其居久其國福

厚。句易福薄徐廣曰易猶輕速也。漢書天文志。大白

所居久其國利。句易其鄉凶。蘇林曰易疾過也是古

謂疾速爲易也。引之謹案孟子梁惠王篇。梁耕易耨。易

耨亦謂疾耨也。易讀如字。趙注易耨。芸苗令簡易也。孫賁音義。易以歧切。皆失之。管子

度地篇曰。大暑至利以疾耨。殺草歲是其證。齊語曰。澠

耕而疾耨之以待時雨。義亦同也。

吳語。一日惕。一日畱。韋注。惕疾也。畱徐也。

惕與易聲近而義同。

後人不知易有疾速之義。故或以爲改易。或

以爲簡易。望文生訓。而古義遂失其傳矣。

若爲三師以肄焉。

三十年傳。若爲三師以肄焉。一師至。彼必皆出。彼出則

歸。彼歸則出。楚必道。敝杜注曰。肄猶勞也。釋文曰。肄本

又作肄。家大人曰。作肄者本字。作肄者借字也。

肄。肄古字通。聘

禮記。爲肄。古文肄爲肄。周官小宗。伯肄儀。故書肄爲肄。玉藻。肄束及帶。肄讀爲肄。

大雅皇矣。箋

曰。肄。犯突也。春秋傳曰。使勇而無剛者。肄之。案隱九年傳。使勇而無剛者。嘗寇而速去之。卽所謂肄也。文十二

年傳若使輕者隸焉其可杜注曰隸暫往而退也此傳曰若爲三師以隸焉彼出則歸彼歸則出義竝相同。

有所有名而不如其已

三十一年傳邾黑肱以濫來奔賤而書名重地故也君

子曰名之不可不慎也如是夫

絕句杜以夫字下屬爲句失之

有所有

名而不如其已以地叛雖賤必書地以名其人終爲不義不可滅已杜解有所有名而不如其已曰有所謂有地也引之謹案所時也言名者人之所欲得也然有時有名而不如無名若邾黑肱之以地叛而書名是也文十三年公羊傳往黨衛侯會公于沓何注曰黨所也所

猶時也。大戴禮本命篇曰：婦人在家從父，適人從夫。夫
从從子，無所敢自遂也。言無時敢自遂也。襄二十七年
左傳曰：凡諸侯小國，晉楚所以兵威之畏，而後上下慈
和，慈和而後能安靖。其國家言晉楚時以兵威小國，而
後小國得以安靖也。昭七年傳曰：從政有所反之以取
媚也。言有時反其道以取順於民也。三十年傳曰：晉之
喪事，敝邑之間先君有所助執紼矣。若其不閒，雖士大
夫有所不獲數矣。墨子節用篇曰：其欲早處家者有所
二十年處家，其欲晚處家者有所四十年處家。此皆古
人謂時爲所之證。

不爲義疾

君子動則思禮行則思義不爲利回不爲義疾

釋文爲子爲反

杜解不爲義疾曰疾病也見義則爲之引之謹案不爲義疾當作不爲不義疾杜曲爲之說非也上文曰終爲不義下文曰懲不義也又曰作而不義文皆相承此處脞一不字目不爲不義疾言不爲不義而內省多疾也不義卽回邪也昭二十年傳曰君子不爲利疚於回不以回待人蓋不義不犯非禮語意略與此同後漢書文苑傳不爲利回不爲義疚中論考偽篇引傳文亦作不爲義疚則後漢時傳文已脫不字。

魯君世從其失

三十二年傳魯君世從其失季氏世脩其勤民忘君矣

釋文從子用反失字無音家大人曰失讀爲佚

佚字又作逸

佚與勤正相反言魯君世繼其佚以失民季氏世脩其

勤以得民也古多以失爲佚

見九經古義

元年春正月辛巳晉魏舒合諸侯之大夫于狄

泉將以城成周 庚寅裁 城三旬而畢

引之謹案昭三十二年傳冬十一月晉魏舒韓不信如

京師合諸侯之大夫于狄泉尋盟且令城成周與此爲

一事不應已見於前年冬十一月又見於是年正月也

以經考之仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周書於昭三十二年冬不書於定元年春則狄泉之會實在前年而不在此年明甚晉語敬王十年劉文公與襄宏欲城成周爲之告晉敬王十年傳昭之三十二年也見韋注及史記十二下遂云是歲也魏獻子合諸侯之大夫於狄泉遂田于大陸焚而外則狄泉之會實在昭三十二年韋注云魯定之元年失之辨見國語正與春秋經合然則昭三十二年傳元載狄泉之會於冬十一月者爲得其實而定元年傳元年春正月合諸侯之大夫于狄泉年時與月皆失其實

矣。元年傳又云：庚寅栽杜氏長麻，以爲元年正月乙亥朔。辛巳爲正月七日，庚寅爲十六日，案辛巳庚寅皆當在昭三十二年十一月。據長麻，昭三十二年十一月丙子朔，則辛巳在十一月六日，庚寅在十五日。昭三十二年傳：冬十一月己丑，士彌牟營成周，計丈數，揣高卑，度厚薄，仞溝洫，勸土方，議遠邇，量事期，計徒庸，慮材用，書餼糧，以令役於諸侯。己丑正在庚寅之前一日。長麻云十四日蓋十一月十四日令役，十五日遂設板築也。若以庚寅栽爲正月十六日事，則豈有自十一月己丑令役，歷兩月之久而始設板築者乎？元年傳又云：城三旬而畢，計

當始於昭三十二年冬十一月十五日庚寅畢於十二月十五日巳未不畢於十二月十四日者長麻云十一月小非自定元年正月築城至二月始畢也杜氏不悟元年春正月合諸侯之大夫爲誤載前年十一月之事乃以辛巳庚寅竝屬之元年正月疏矣

孟懿子會城成周

杜注曰不書公未卽位引之謹案孟懿子會城成周卽昭三十二年經所書冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周也傳當屬之前年十一月誤載於是年正月耳

非是年正月實有孟懿子會城成周之事而經不書也
且城三旬而畢則前年十二月築城已畢說見前尙何正
月會城成周之有。

備物典策

定四年傳分之土田陪敦祝宗卜史備物典策官司彝
器正義曰服虔云備物國之儀物之備也當謂國君威
儀之物若今繡扇之屬備賜魯也杜不解備物則與典
策爲一也備物典策謂史官書策之典若傳之所云發
凡之類賜之以法使依法書時事也引之謹案服解備
物未確孔合備物與典策爲一尤屬未安竊謂備物卽

服物也。經傳多言服物祭義曰：以具服物以脩宮室。周語曰：亦唯是生从之服物采章。又曰：服物昭庸采飾顯明皆是也。土田陪敦祝宗卜史服物典策皆四字平列服與備古字通。趙策騎射之服。史記趙世家作騎射之備。漢書王莽傳所征殄滅盡備厭辜。卽盡服厭辜。皆其證。凡從服從蒨之字古多通用。後漢書皇甫嵩傳注曰：備古服字。繁辭傳服牛乘馬。說文引作犗牛乘馬。倍二十四年左傳伯服。史記鄭世家作伯犗。

少帛

分康叔以大路少帛。精夜旃旌。賈逵注曰：少帛雜帛也。見史記衛世家集解。杜預注同。正義曰：周禮司常云：通帛爲旃。雜

帛爲物。鄭元云通帛。謂大赤無飾。雜帛者以帛素飾其側。大赤是通帛。知少帛是雜帛也。引之謹案。雜帛者。謂其帛色赤白相雜也。雜與少不同義。不得以少帛爲雜帛。且雜帛爲物。物是旗名。而雜帛則非旗名。可謂之物。不可謂之雜帛。亦不可謂之少帛。猶之通帛爲旗。可謂之旗。不可謂之通帛也。今案少帛蓋卽小白。逸周書克殷篇。縣諸小白。孔晁注曰小白旗名。齊桓公名小白。蓋以旗爲名。若齊大夫樂施字子旗。孔子弟子榮旂字子旗之類也。少與小。帛與白古字並通。玉藻大帛不綬。鄭注帛當爲白。閔二年左傳大帛之冠。雜記注引作大白。小雅六月白旆央央。孫炎爾雅注引作帛旆。英英子思之子名白。漢書孔

先傳作帛是白與帛通少小
之通書傳甚多不煩枚舉

基閒王室

管蔡啟商基閒王室杜注曰基毒也管叔蔡叔開道紂
子祿父以毒亂王室正義曰基毒閒亂賈逵云然是相
傳訓也引之謹案毒亂之語不解基之言基基謀也閒
犯也說見前以謂謀犯王室也兩雅曰基謀也康誥曰
周公初基作新大邑于東國洛鄭注以基爲謀是也廣
韻基教也。一曰謀也訓基爲教本於宣十二年傳楚人
基之脫局注訓基爲謀疑卽此傳舊注也玉篇謀謀也
廣韻基謀也謀基基竝字異而義同。

以約爲利

鍾金初宦於子期氏。

今本鍾譌作鍾據釋文唐石經改。

實與隨人要言。

王使見辭曰不敢以約爲利杜注曰此約謂要言也引之謹案杜以上文乘人之約爲乘人之窮困故別之曰此約謂要言也其實約與利相對爲文仍謂窮困耳昭二十八年傳居利思義在約思純約與利亦相對言因楚子窮困而得見則是以約爲利檀弓曰父死之謂何又因以爲利文義與此相似陸案左傳附注曰不敢乘君父困約之時以爲利是也

如驂之靳

九年傳吾從子如驂之靳釋文云本或作如驂之有靳
非也家大人曰作有靳者是也陸本脫去有字反以有
有字者爲非誤矣案杜注云車中馬也猛不敢與書
爭言已從書如驂馬之隨靳也正義云說文云靳當膺
也則靳是當胸之皮也驂馬之首當服馬之胸胸上有
靳故云我之從子如驂馬當服馬之靳以上正義如杜說則
靳卽服馬也驂馬後於服馬故曰如驂之有靳如孔說
則靳是當胸之皮也靳在服馬之胸正當驂馬之首故
曰如驂之有靳若云如驂之靳則文不成義矣而疏首
所列經文亦作如驂之靳則後人改孔以從陸也秦風

小戎釋文引沈重音義云。靳者言無常處游在服馬背

上。

今本服誤作多依釋名改

以驂馬外轡貫之以止驂之出引左傳

云。如驂之有靳如沈說則靳是服馬背上之游環也。貫驂馬之外轡以止驂之出故曰如驂之有靳。三說不同而靳上皆當有有字。自唐石經依釋文刪去有字。而各本遂沿其誤。鄭風大叔于田正義引此亦作如驂之有靳。則是孔本原有有字。與沈重所引同。不當改孔以從陸也。

彤鏤

哀元年傳。器不彤鏤。杜注曰。彤丹也。鏤刻也。陸粲附注。

後錄曰。彫當作彫。文相近而譌也。家語車不彫。幾器不

彫。

問禮篇。

惠氏定字曰。彫古彫字。陳氏芳林曰。案家語

一本仍作彫。引之謹案。作彫者是也。車不彫。幾器不彫。

鏤兩彫字。重出則不詞矣。

少儀曰。車不雕。幾。食器不刻。

刻鏤雕字皆不重。

陸說非也。惠以彫爲古彫字。蓋以周舟古字

通。彫從周聲。則亦可從舟聲。故彫字古作彫。彫與彫相

似。因誤爲彫。目案說文。彫。

丑朴反。

船行也。從舟。彡聲。非從

彡。舟聲不得爲古彫字。書傳中彫字亦無作彫者。若直

以彫爲古彫字。則於理尤不可通。惠說亦非也。今案周

語器無彫鏤。韋注曰。彫。丹也。鏤。刻金飾也。賈子禮容語

篇作蟲鏤

建本潭本皆如是俗本作雕鏤乃後人以意改之

楚語不聞其以土

木之崇高彤鏤爲美韋注曰彤謂丹楹鏤謂刻桷吳越

春秋王僚使公子光傳作蟲鏤蟲者赫之借字說文赫

徒冬反

赤色也從赤蟲省聲

管子地員篇曰赫莖黑秀

通作蟲又通作

彤

彤從冬反大雅雲漢篇蘊隆蟲蟲徐邈音徒冬反爾雅作煥燿郭璞亦音徒冬反

故左傳國

語作彤鏤賈子吳越春秋作蟲鏤陸以彤爲彤之譌惠

又以彤爲古彤字皆未考蟲鏤之文也

三軍之事乎不與謀師乎師乎何黨之乎

五年傳景公外乎不與埋三軍之事乎不與謀師乎師

乎何黨之乎引之謹案三軍下之字何黨之下乎字皆

衍文也景公外乎不與埋三軍事乎不與謀師乎師乎

何黨之皆以七字為句而韻在句末埋古讀若狸謀古讀若媒皆在之部

故與之為韻若師字古音在脂部師六五長子帥師與

尸為韻秦風無衣篇王于興師與衣為韻曹風下泉篇

念彼京師與著為韻小雅節南山篇尹氏大師不立空

我師與氏維咄迷為韻瞻彼洛矣篇以作六師與茨為

韻大雅板篇曾莫惠我師與齊咄迷尸屎棄資為韻昭

十二年左傳為諸侯師與淮坻為韻皆與脂部之字為

韻而無入之部者則師與之非韻不得因師乎師乎而於之下增乎字也今弟二句衍之字

弟三句末衍乎字則長短參差而韻亦不顯矣史記齊世家載此文曰景公外乎弗與埋三軍事乎弗與謀是三軍下無之字之證唐石經始又曰師乎師乎胡黨之

乎之下乎字則後人據誤本左傳加之也集解引服虔

左傳注曰師厭也黨所也言公子徒厭何所適也服注言何所適也而不言何所適乎則傳文本無乎字可知唐石經初刻但作何黨之而無乎字此舊本之尙存者或又注乎字於之字旁則爲俗本所惑矣。

潛師閉塗

六年傳潛師閉塗逆越女之子章立之而後還服虔注

曰閉塗不通外使也

見史記楚世家集解杜預同

引之謹案閉塗二

字文不成義塗非門關之類不可得而閉也且是時方

將迎惠王於國中而先絕其往來之塗則惠王無由至

軍中矣塗當爲壁字相侶而誤也

壁字下作土與塗同其石旁之字又與余

相伯故墨子備城傳篇廋人辟
火而復攻備梯篇辟誤作除

史記楚世家伏師閉塗

徐廣曰塗一作壁列女傳楚昭越姬篇載此事亦作伏
師閉壁是古本正作壁也蓋楚之諸臣恐昭王之以爲
鄰國所知故作爲伏師閉壁之狀使人莫測其意也服
虔作注時傳文已誤作塗故不得其解史記作塗者乃
後人以誤本左傳改之其一本作壁與列女傳合則舊
本也小司馬不能審擇乃從作塗之本而以攢塗說之
案攢塗者殯也殯當於廐不當於軍中且惠王未至而
殯無是理也其說尤誤

先王

十三年傳魯將以十月上辛有事於上帝先王陳氏芳
林攷正曰案正義曰周之十月非祭上帝先公之時則
先王似當作先公惜石經殘闕家語載此事亦作先王
辭物篇家大人曰作先公者是也今本作先王者後人依
家語改之耳桓五年正義引此正作先公。

一盛

旨酒一盛兮杜注曰一盛一器也引之謹案聚大記會
粥於盛鄭注云盛謂今時杯杆也。

叔孫氏之車子鉏商

十四年傳叔孫氏之車子鉏商獲麟杜注曰車子微者

鉏商名

孔叢子記問篇叔孫氏之車子曰鉏商蓋襲用杜注也

正義引服虔曰車

車士微者也子姓鉏商名又引家語曰叔孫氏之車士

曰子鉏商王肅曰車士將車者也子姓鉏商名引之謹

案服以車爲車士是也聘禮記胙肉及虞車鄭注曰虞

虞人也車巾車也一人掌視車馬之官也晉語其上朝

升之而莫戮其車韋注曰車車僕也則主車之人卽謂

之車哀六年傳有鮑子之臣差車鮑點杜彼注曰差車

主車之官此傳曰叔孫氏之車蓋叔孫氏之差車也元

和姓纂殷湯子姓引風俗通義曰左傳有子鉏商蓋亦

謂車爲車士故以子屬下讀是服說長於杜矣而未盡

也春秋時婦人稱姓男子則稱氏族以子爲姓非也今
案子鉏蓋其氏商其名也傳凡言子儀克子越椒之類
上二字皆字也子服何子人九之類上二字皆以先世
之字爲氏也成十六年及哀五年傳皆有公子鉏定八
年傳有籍邱子鉏是春秋時多以鉏爲名字今此子鉏
知非字者古人名字相應鉏與商不相應故也廣韻鉏
字注曰又姓左傳有鉏麇則春秋時有以鉏爲氏者漢
書古今人表有子鉏商是子屬下讀之明證也易林訟
之同人子鉏執麟春秋作經蔡邕麟頌庶士子鉏獲諸
西狩是子鉏連讀之明證也

爭明

十六年傳與不仁人爭明無不勝杜預與不仁人爭爲句明無不勝爲句注曰明無不勝言必勝家大人曰疑當讀與不仁人爭明爲句明猶彊也周語說殺雒陽曰滑夫二川之神使至於爭明以妨王宮亦謂爭彊也韋注日明精氣管子四時篇風與日爭明也失之

使處吳竟

使處吳竟爲白公家大人日子西召勝歸楚則當使處楚竟不當使處吳竟且吳爲敵國子西安能使勝處吳竟乎唐石經此處殘缺不可考而各本皆有吳字太平

寰宇記蔡州襄信縣下引此同子謂吳字乃涉上文在
吳而行請以七證明之杜注去白楚邑也白既爲楚邑
則不當云使處吳竟爲白公一也上文子西曰舍諸邊
竟使衛濬易謂舍諸楚竟也若云使處吳竟則與上文
不合一也下文云吳人伐慎白公敗之則勝之在楚不
在吳甚明若云使處吳竟則又與下文不合三也楚語
子西曰欲實之竟韋注引此文云使處竟爲白公今本
竟上有吳字乃後人依誤曰處竟曰實之竟皆指楚竟
本左傳加之與正文不合而言四也楚語又云靈王虐白公子張驟諫是白在楚
竟故楚子張亦號白公五也史記五子胥傳云遂召勝

使居楚之邊邑。鄢號爲白公。文與左傳略同。而云楚之邊邑。不云吳之邊邑。六也。周官調人疏引此作使處竟。爲白公。無吳字七也。

魯人之泉 使我高蹈

二十一年傳魯人之泉。數年不覺使我高蹈。杜注曰。泉緩也。高蹈猶遠行也。言魯人泉緩數年。不知荅齊稽首。故使我高蹈來爲此會。引之謹案。訓泉爲緩。於古無據。云數年不知荅齊稽首。亦非也。十七年公及齊侯盟于蒙。已不知荅齊稽首矣。何待數年乎。泉當讀爲咎。言魯人不荅稽首之咎。數年而猶不自覺。故使我高蹈而來也。

古聲泉與咎同故字亦相通

書泉陶古文作咎錄德三十三年左傳狄人伐唐咎

如書序咎單作明居咎字並與泉同音又暮鼓之暮下以咎得聲考工記作皋鼓後漢書馬融傳作咎鼓

文曰唯其儒書以為二國憂正謂魯人拘守儒書故數

年不知其咎也左傳多古字後人失其讀耳又案呂氏

春秋知化篇子胥高蹶而出於延高注曰蹶蹈也傳曰

魯人之皋使我高蹈瞋怒貌此之謂也

以上呂氏春秋注

是高

蹈為瞋怒貌說文蹶跳也蹈亦騰躍二名故高注訓蹶

為蹈淮南原道篇曰經紀山川蹈騰崑崙蹈騰連文而

其義相近樂記發揚蹈厲之已蚤蹈厲謂騰上也

虞雅

上也楚辭遠遊曰徐弰節而高厲蹈厲連文而其義相近又曰不知手

之舞之足之蹈之列子湯問篇曰師襄乃撫心高蹈皆
謂騰躍而起也凡人喜甚則高躍怒甚亦高躍故曰高
蹈瞑怒貌也杜以高蹈爲遠行亦失之高蹈非遠行之
謂且齊魯盟于
顧顧是齊地
不得言遠行

經義述聞第十九